

Regional News Unit AIR Aizawl
Sunday, April 21, 2024
Time - 7:30 -7:40Hrs
REGIONAL NEWS BULLETIN

HEADLINES (MORNING)

- Mizoram Lok Sabha inthlana vote tla zat chhianchhiah thar berah vote tla zat a pung hret a, za-a 56.87 a tla .
- India leh Myanmar inkalhpawhna lei chu hawn leh a ni tawh.
- Lok Sabha inthlan thawh 3-na tura chuh tumte lehkha thehluh endik a ni a, naktuk thleng inhnudawh leh theih a ni.
- India Lawng sipai pawl-te chuan ‘Exercise Poorvi Lehar’ hming vuahin khawchhak tuipuah nunchan an zir.



56.87 VOTERS TURNED OUT IN POLLING IN MIZORAM

Mizoram Lok Sabha inthlana vote tla zat hriat thar berah vote tla zat a pung leh hret a, za-a 56.87 a tla a ni.

Mizoram Lok Sabha bialah hian Polling Station 1276 a awm a, heta vote tla zat hi Rorm 17A leh lehkha pawimawh dangte hmangin chhinchhiah fel a ni tawh a. Vote tla zawng zawng chu 4,87,103 a ni a. Mipa vote thlak 2,41,213 an awm a, hmeichhe vote thlak 2,45,800 an awm bawk a. Postal Ballot hmanga vote tla leh EPBS hmanga vote tlate chhiar tel a la ni lo a ni.

Tun tum inthlanah khan Assembly bial anga Vote tlak thatna ber chu 36-Tuichawng (Lawngtlai District) niin vote tla hi 72.48% a ni a. Vote tla a tlemna ber chu 13-Aizawl East-I (Aizawl District) niin vote tla zat hi 48.22% a ni.

Postal Ballot leh Electronically Transmitted Postal Ballot System (ETPBS) kaltlanga vote tla chhiar tel a la ni lo a. Postal Ballot kaltlanga vote tla zat chu April ni 19, 2024 thleng khan 2107 a ni a. Hengte hi Home Voting atanga vote tla 1983 leh Essential Services vote 124 an ni a. Electronically Transmitted Postal Ballot System (ETPBS) kaltlanga thawn chhuah Service Voters 4693 te vote thlak zat hi hriat theih a la ni lo bawk a ni.

Kum 1977 atang khan Lok Sabha MP Inthlanpui hi wawi 12 buatsaih a ni tawh a, vote a tlak that ber tum chu kum 1996 kha niin vote tla zat hi za-a 73.41% a ni a, a chhiat ber tum chu kum 1977 niin vote tla zat chu 49.92 % a ni. Hei bakah hian Kum 2024 a vote tla zat aia a tlem hi tum hnih dang a la awm a, kum 1980-ah 56.12% leh kum 2009-ah 51.86% a ni.

Hriattheih chinah tun tum Lok Sabha inthlana Polling Station-a vote thlak zinga upa ber chu Pu Thanglianhluma, Lawngtlai College Veng a ni a, kum 104 mi a ni, vote thlak zinga a upa ber dawttu chu Pi Hrangkili, Ramhlun North, Aizawl, kum 103 mi (a ni).



FRIENDSHIP GATE REOPEN

Assam Rifles-te chuan nimin chawhnu her dar 1-ah khan Zokhawthar leh Khawmawi inkara ram 2te inkalhpawhna gate an khar chu an hawng leh tawh.

Thudawnnain a sawi danin ramri gate hi April ni 30 thleng hawn chhunzawm a ni ang a. May ni 1 atanga khar chhunzawm leh a ni ang.

Puan tawh angin vote thlak ni tlai Dar 4:00 p.m. Khan Serchhip a awm Assam Rifles commandant chuan Zokhawthar khawtlang hruaitute leh Zokhawthar ral lehlam, Khawmawi khawtlang hruaitute Tiau Lei ah thil pawimawh sawi pui tura insawiin a ko khawm a.

Zokhawthar VCP Pu Lalmuanpuia hnen atanga thu dawn danin, Inthlan Vote thlak hun tawp hmain Zokhawthar khawtlang hruaitute hi Tiau lui kamah koh an ni a, tun a tangin thu leh awm hma chuan India leh Myanmar in kar ramri chu khar a ni a ti a, eng ti kawng mahin intlawhpawh a theih rih loh a ti bawk a, hei vang hian Zokhawthar leh Khawmawi khawtlang hruaitute an lungawi lo hle a ni.

<><><>

SAVE THE RIPARIAN

Aizawl khawpui tui lakna, Tlawng lui fintu kawr bawlhhlawh thenfai beihpui chu 'Save The Riparian' pawl chuan an thlak mek a, nimin khan hnatlangpui koh niin an thawhchhuah ni 20-na tur a ni a, mi thahnemngai engemaw zat hnatlang in an chhuak a ni.

Save The Riparian hian an hnathawh hi ni 20 chhung aw h tura ruahman ni mahse bawlhhlawh a tam avangin an duh anga chakin an thian fai theilo a, an hotute sawi danin Sakhisih lui lama an kutthlak khar nan hnatlangpui koh a ni a, hriat theih chinah ZoTrek, MZP, BVP Racing Team, ZMC, D'purification, Model Veng leh mithahnemngai engengemaw zat ten ten an hnatlangpui dawn a heng bakah hian Tlawmngaia hnatlang thei apiang thawk chhuak turin an sawm tih an sawi bawk.

Frontline Leader Romalsawma sawi danin ni 20 chhunga an hnathawh ah hnatlang zawm duh an awm belh zel a, an thawh tawhah mipui thlawpna an hmu tha a , veng hrang hrang atangin an hnatlang thin tih sawiin Sawrkar lam chu Lok Sabha inthlan avangin an la che theilo a, mi thahnemngai sum tlingkhawm atangin hna an thawk a, tun thlenga tanpuina lut chu cheng nuai 2 chuang a tling tawh a ni.

Frontline Leader sawi danin luidung chu a tawp hle a, Bawlhhlawh bawmah an hmang ani deuh ber tih sawiin an tihfai sa ah an lo paih leh zel bawk a, bag tam tak an chhar khawm leh thin tih sawiin Septic Tank thli chu lui ah paih tlang an awm thin bawk a, Aizawl tui tlan anih avangin theihtawpa theihtawpa uluk a pawimawh tih a sawi.

Pu Romalsawma sawi danin an hnatlang chu March ni 26 khan AMC Mayor Pu Lalrinenga Sailo in a hawng a, Mission Vengthlang leh Model veng inrina atangin an tan a ni a, mipui thlawpna hmun hrang hrang atanga an dawng chu lawmawm atih thu a sawi bawk.

<><><>

CENTRAL JAIL SKILL DEV

Central Jail, Aizawl a tang mek Hmeichhiate tan District Legal Services Authority, Aizawl bul tumin training buatsaih sak a ni a.

Nimin a hawna hun chu, Justice Marli Vankung, Gauhati High Court Judge a hmanpui a, thusawiin Jail tang mekte chu thahnem ngai taka Skill Development training chu kalpui turin a sawm a. Heng an thil zirte hmanga khua leh tui tha ni tur leh Pathian zahna thinlung pu zel turin a chah a; Jail tang hmeichhiate mamawh infiamna bungraw hrang hrang a hlan nghal bawk a ni.

Pi Lalrochami Ralte, MJS, District Legal Services Authority, Aizawl Secretary chuan Skill Development training Hmeichhe tang mekte tana an buatsaih chu National Legal Services Authority scheme atanga ruahman a ni tih sawiin;

NALSA Scheme atang hian Jail tang mekte chu an tan chhunga nunphung pangngai an zawh theihna turin training hrang hrang pek an ni dawn a, he remchanna hi hmang tangkaia an zirtirna dawnte, Jail an chhuahsan hnu pawha eizawna nghet an lo neih nan leh an intodelh ngeina tura hmalakna hman tangkai a tul thu a sawi bawk.

He training ah hian chhang ur, puanthui, puantah, beauty culture leh sam tan bakah eitur chi hrang hrang siamdan te chu mithiamten an zirtir dawn thu a tarlang bawk a ni. Trainging programme hawna ah hian Pu R. Vanlalsawta, IG Prison pawh in thu sawiin, Central Jail hotute leh thawktute he hunah hian an tel bawk.



SCRUTINY OF NOMINATION PAPERS FOR THIRD PHASE HELD; LAST DAY OF WITHDRAWAL ON MONDAY

Nimin khan Lok Sabha inthlan thawh 3-na tura chuh tumte lehkha thehluk endik a ni a. Naktuk thawhtan thleng khian inhnudawh leh theih a ni ang.

Lok Sabha inthlan thawh 3-na tura chuh tumte tan Zirtawp ni thleng khan hming thehluk hun hawn a ni bawk.

Lok Sabha inthlan thawh 3-na atan hian thla thar May ni 7-ah vote thlak a ni dawn a. He hunah hian state 10 leh UT 2 huam chhunga Parliament bial 94-ah vote thlak a ni ang.

Hetihlai hian Lok Sabha inthlah thawh 4-na chuh tur tana hming thehluk hun hawn mek a ni a. Thawh 4-naah hian state 9 leh Jammu and Kashmir UT-a Parliament bial 96 ah May ni 13 khian vote thlak a ni dawn a ni. Inthlan thawh 4-na chuh tur tan thla ni 25 thleng hming thehluk hun hawn a ni.

Lok Sabha inthlan thawh 2-na, tun thla ni 26-a vote thlak turah pawh ngawrh taka campaign mek a ni.



PM MODI TO INAUGURATE 2550TH BHAGWAN MAHAVEER NIRVAN MAHOTSAV IN NEW DELHI

Vawiin hi Jain sakhaw betute kut pawimawh Mahaveer Jayanti a ni a. Hemi pual hian Prime Minister Narendra Modi-a chuan chawhma dar 10 khian New Delhi-a Bharat Mandapam-ah Bhagwan Mahaveer Nirvan Mahotsav vawi 2550-na a hawng dawn a. Hemi rual hian hemi puala buatsaih stamp leh pawisa thir a tlangzarh bawk ang.

Bhagwan Mahavir-a chu Tirthankar (Jain sakhaw betute sakhaw puithiam) 24-na a ni a. Remna leh muanna, inunauna thlentua ngaih a ni a. Tharum thawh loh, thudik tan, ruk ruk loh, hur sualna laka fihlim leh chakna sual tihreh tihte chu a thuken a ni.

Hemi pual hian vawiin hian Sawrkar chuan Jain sakhaw zuitute nen Bharat Mandapam-ah hnam ziarang pholanna programme chi hrang hrang a buatsaih dawn a ni.



INDIAN NAVY CONDUCTED EXERCISE POORVI LEHAR ON EAST COAST

India Lawng sipai pawl (Indian Navy)-te chuan 'Exercise Poorvi Lehar' hming vuahin khawchhak tuipuah nunchan an zir.

Hei hi India tui puia himna chhawm nung tura Lawng sipaiten an tihdan phung pangngai zulzuia chetna a ni. Defence Ministry thuchhuahin a sawi danin he nunchan zirnaah hian lawng lian, tuihnuai lawng, indo thlawhna leh Special force-te pawh an tel a. A taka ralthuam chelek dante leh indo nun chan chi hrang hrangte hlawhtling takin an zir a ni.



US SANCTIONS CHINESE AND BELARUSIAN COMPANIES FOR PROVIDING BALLISTIC MISSILE COMPONENTS TO PAKISTAN

United States chuan Pakistan hnena ballistic missile siamna tura a bung hrang an pek avangin China leh Belarus company-te a hrek.

Chu'ngte chu Chinaa inkhuar company pathum leh Belarus-a inkhuar company pakhat a ni a. Heng company-te hian Pakistan hnenah Pakistan-in missile siamchhuah a tum meknaa hmanraw pawimawh an tumsak a ni.

